



Pou Piblikasyon Imedya: 03/01/2023

GOUVÈNÈ KATHY HOCHUL

## GOUVÈNÈ HOCHUL ANONSE KÒMANSMAN PWOJÈ AMELYORASYON 9.3 MILYON DOLA NAN PAK ETA BAYARD CUTTING ARBORETUM

*Amelyorasyon yo enkli novo sant vizitè, pakin amelyore, ak ekspozisyon amelyore*

*Sit la se youn nan dènye gran pwopriyete 19yèm syèk ki rete sou rivaj sid Long Island*

*Gade reprezantasyon pwojè a [isit la](#)*

Gouvènè Kathy Hochul te anonse jodi a kòmansman yon pwojè konstriksyon 9.3 milyon dola pou yon novo sant vizitè, pakin amelyore, ak ekspozisyon amelyore nan Pak Eta Bayard Cutting Arboretum nan Konte Suffolk.

"Pak Eta Bayard Cutting Arboretum te atire vizitè pandan plizyè dizèn ane epi li se yon bèl egzanp gwo pwopriyete yo sou rivaj sid Long Island pandan 19yèm syèk la", **Gouvènè Hochul te deklare.** "Amelyorasyon sa yo pral fè yon vizit nan sit istorik sa a se yon eksperyans ki ankò pi anrichisan ak agreyab, epi pral asire ke jenerasyon Nouyòkè yo jwi li".

Plan yo prevwa ke pwojè konstriksyon plizyè faz la ap fini nan sezon otòn 2024 la. Travay la pral gen ladan yon novo Sant Vizitè 1,600 pye kare pou edike vizitè yo sou fanmi Cutting ak mansyon istorik 60 chanm yo, ki gen fòm Tudor yo, teren peyizaje yo avèk anpil varyete pye bwa, touf ak plant, ak enpak chanjman klimatik k ap kontinye nan Long Island.

Yo pral konstwi tou 248 novo espas pakin, pave ak lajè estanda pou ranplase etalaj aktyèl la nan espas pakin ki piti. Sèvis elektrik nan chato a pral amelyore tou.

Pwojè 9.3 milyon dola a te finanse pa plizyè patnè ki gen ladan yon don 1.5 milyon dola ki soti nan Konsèy Administrasyon Bayard Cutting atravè Natural Heritage Trust, ansanm ak sibvansyon ki soti nan New York Works (4.8 milyon dola), Fon federal pou Konsèvasyon Tè ak Dlo (2.3 milyon dola) ak Fon Pwoteksyon Anviwònman Eta a (750,000 dola).

**Komisè Pak Eta yo, Erik Kulleseid te deklare**, "Sipò jenere nan men administratè Bayard Cutting yo, ansanm ak finansman eta a, reprezante kalite patenarya publik/prive ki gen anpil valè pou State Parks ak Natural Heritage Trust. Amelyorasyon sa yo pral fè yon vizit nan plas espesyal sa a, ki te etabli yon rekò frekantasyon nan ane 2021, vin ankò pi bon".

**Scott Wise, Prezidan Administratè Bayard Cutting yo, te deklare**, "Sa te fè plizyè ane preparasyon reflechi ant Eta a ak Fidisi a epi nou kontan patisipe nan amelyorasyon espektakilè sa a nan Arboretum (koleksyon botanik) lan".

**Senatè Eta a, Alexis Weik, te deklare**, "Pak Eta Bayard Cutting Arboretum lan se yon jwayo pou Long Island ak kominote nou yo. Gen anpil moun ki renmen pak la, ki gen ladan mwen menm ak fanmi mwen, epi avèk istwa istorik ak rich li a, mwen kontan dèské l ap resevwa amelyorasyon li bezwen ak merite yo".

**Manm Asanble, Jarett Gandolfo, te deklare**, "Envestisman sa a nan Arboretum lan pral non sèlman fè eksperyans vizitè a ankò pi bon, men li pral ede tou prezèvè yon pati enpòtan nan istwa Long Island pou jenerasyon alavni yo ka jwi".

Efò pou dirabilite yo enkli yon rezo enèji solè fotovòltayik sou twati Sant Vizitè a, ekleraj LED pakin nan, estasyon rechaj veyikil elektrik ak pavaj asfalt pèmeyab nan pakin yo ki pral amelyore drenaj dlo lapli yo ak kalite dlo.

Pak la pral rete ouvri pandan konstriksyon an. Y ap devlope yon aplikasyon/sit entènèt entèraktif tou pou oryante vizitè yo nan Arboretum lan epi pou aprann sou pye bwa ak jaden espesifik ki ladan.

Nouvo Sant Vizitè a, ke MBB Architects konsevwa, pral yon pavyon an vè pou abrite ekspozisyon nan papòt chato ak teren 19,000 pye kare a. Ekspozisyon yo pral mete aksan sou pye bwa ak plant ki fòme arboretum lan, syans kwasans pye bwa a, istwa pwopriyete a, ak etap y ap pran kounye a pou reponn a chanjman klima lòm pwovoke. Kontraktè jeneral sou pwojè a se pral G&M Earth Movers, avèk Central Air Corp kòm kontraktè mekanik, Roland's Electric Inc. kòm kontraktè elektrik ak KG Mechanical Inc. kòm kontraktè plonbri. Gwoup LiRo a pral fè jesyon konstriksyon an.

Plis pase 471,000 moun te vizite arboretum lan nan ane 2021, yon rekò anyèl ak yon ogmantasyon prèske 90 poustan depi 2015. Depi 2003, plis pase 4.4 milyon moun te vizite pak 280 ekta ki sitiye sou pitorèsk Rivyè Connetquot la.

Chato pwopriyete a rete konsève nan estil orijinal li yo avèk mèb tipik epòk pwopriyete a. Vizit gide nan chato a, ki te itilize dènyèman pandan tounaj *The Gilded Age* HBO Max la, disponib pandan sezon an. Pak la gen tou yon seri santye randone ki ouvri pandan tout ane a. Lakou arboretum yo te fèt pou pwopriyetè orijinal William Bayard Cutting, yon avoka rich, finansye, pwomotè byen imobilye, rafinè bètrav sik, ak filantwòp, pa Frederick Law Olmsted, ki te anvan sa konsevwa Pak Santral nan vil New York ak sa ki ta pral tounen Pak Eta Niagara Falls.

Pak la te nan lis Rejis Nasyonal Kote Istorik yo depi 1973 kòm yon distri istorik.

Biwo Pak, Lwazi ak Prezèvasyon Istorik (Office of Parks, Recreation and Historic Preservation, OPRHP) la nan Eta New York sipèvize plis pase 250 pak, sit istorik, santye rekreyatif, tèren gòlf, ranp lansman bato ak plis bagay toujou, ki resevwa vizit rekò 78 milyon moun chak ane. Pou plis enfòmasyon sou nenpòt nan zòn rekreyatif sa yo, rele 518-474-0456 oswa ale sou [www.parks.ny.gov](http://www.parks.ny.gov), konekte avèk nou sou [Facebook](#), oswa swiv nou [Instagram](#) ak [Twitter](#).

Natural Heritage Trust se yon kòporasyon enterè piblik ki pa gen bi fè pwofi avèk misyon pou resevwa ak administre kado, sibvansyon ak kontribisyon pou sipòte pwogram piblik yo pou pak, Iwazi, aktivite kiltirèl, konsèvasyon tè ak dlo ak pou rezon prezèvasyon istorik Eta New York. NHT akonpli misyon li nan aksepte don, ranmase lajan, ak atravè pwogram koperativ ak pwojè ak patnè ajans li yo: Enfòmasyon sou Biwo Pak, Lwazi ak Prezèvasyon Istorik (OPRHP) Eta New York, Depatman Konsèvasyon Anviwònmantal (Department of Environmental Conservation, DEC) ak Depatman Deta (Department of State, DOS). Pou plis enfòmasyon vizite [www.naturalheritagetrust.org](http://www.naturalheritagetrust.org)

###

Lòt nouvèl disponib sou sit [www.governor.ny.gov](http://www.governor.ny.gov)  
Eta New York | Chanm Egzekitif | [press.office@exec.ny.gov](mailto:press.office@exec.ny.gov) | 518.474.8418